



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

აბრეშუმი

აბრეშუმი (

ა-ის მთლიანი მასა წარმოიქმნება აბრეშუმის ჭის სანაფე (აბრეშუმის გამომყოფ) ჯირკვლებში, საიდანაც გამოიყოფა ორი უწყვეტი ელემენტარული ძაფის სახით. ა. მაგარი, ჭიმვადი, ჰიგროსკოპიული და ჰაერგამტარი კარგი ელექტროიზოლატორია. მისგან ამზადებენ მსუბუქსა და ლამაზ ქსოვილებს, იყენებენ აგრეთვე მედიცინაში (ქირურგ. ძაფად). დანიშნულების მიხედვით შეიძლება იყოს ტექნიკური, საპარაშუტო, სანისქვილე (საცრებისათვის), სატანსაცმლე, სასარჩულე, საქოლგე, საფეხსაცმლე, საბალდადე, გასაწყობი და სხვ. ცალკე ჯგუფს შეადგენს ბუნებრივი ა-გან მიღებული კრეპის ქსოვილები: კრეპდეშინი, კრეპჟორჟეტი, კრეპსატენი და სხვ. სინთეზური ა-ის ქსოვილები ძალიან გამძლეა, მაგრამ მეტად დაბალი ჰიგროსკოპულობით ხასიათდება. არის აგრეთვე ხაოიანი ა-ის ქსოვილები: ხავერდი, პლუში და სხვ.

XIX ს. დასაწყისში იტალიელმა ბატალიმ შექმნა პირველი მექან. აბრეშუმსახვევი დაზგა. ამავე საუკუნის 80-იან წლებში ფრანგმა ე. სერელმა ავტომ. ძაფსაღები დაზგა გამოიგონა. ყოფ. სსრკ-ში მექან. აბრეშუმსახვევი დაზგა („კმს“-10) პირველად თბილ. 26 კომისრის სახ. ქ-ნამ დაამზადა და მოამარაგა ქვეყნის ყველა ძაფსაღები ფ-კა. მექან. ძაფსახვევ დაზგაზე აბრეშუმის პარკის ამოხვევის ზოგი პროცესი ხელით სრულდება. ამჟამად შექმნილია ავტომ. ძაფსაღები მანქანებიც.

საქართველოში ა-ის შინამრეწველური წარმოება ცნობილია უძველესი დროიდან. XIX ს-მდე ჩვენში ფართოდ იყო გავრცელებული ა-ის ძაფის ამოხვევის, დართვისა და ქსოვის წესი. ამოსახვევად გადარჩეულ პარკს მზებზე დაყრიდნენ ხოლმე, რომ შიგ ჭუპრი მოეკლათ.

მერე მდუღარეში ჩაყრიდნენ და ძაფს შულოებად ამოახვევდნენ საგანგებო ხელსაწყოზე („ელართაშე“, „ოვიდაშე“ – სამეგრელოში; „ოგვადო“ – გურიაში, „სამუხველი“, „სამუხოველი“ – იმერეთში; კახეთში სპეციალურ ჯარას, „მანჯანიკს“ ხმარობდნენ). შულოებს ფირფიტაზე გადაახვევდნენ, ამოხვეულ ძაფს დაართავდნენ თითისტარზე, რ-საც სიმძიმისთვის ბოლოზე ქვის კვირისტავი ჰქონდა წამოგებული. ცალწვერად დართულ ძაფს შემდეგ ისევ თითისტარზე ორწვერად და სამწვერად შეაძახავდნენ. დაძახულ ძაფს შულოებად ამოახვევდნენ და დასარბილებლად და გასათეთრებლად ნაცარტუტაში გამოხარშავდნენ. XIX ს. დასაწყისიდან თანდათან გაიზარდა ა-ის ნედლეულის სასაქონლო წარმოება და მისი ექსპორტი დას. ევროპასა და რუსეთში. ა-გან საქსოვ დაზგაზე ქსოვდნენ თავთას, მერდინს, დარაიას; ჩხირებითა და ყაისნალებით – თავსაფრებს, წინდებს, ტოლალებს, ქისებს, ხელთათმანებს, ბადეებს და სხვ.; ფირფიტებით – ჩახსაკრავებს, სახიან სარტყლებს, ყაითნებს, ჩაფირიშებს და ტანსაცმლის სხვა საოლველს. თანამედროვე ა-ის ქსოვილების დამზადება საქართველოში დაიწყო XX ს. 20-იანი წლებიდან (იხ. აგრეთვე სტ. აბრეშუმის მრეწველობა).

ლიტ.: ა ბ ე ს ა ძე ნ., მუაბრეშუმეობა საქართველოში, თბ., 1957; დოლიძე ი., აბრეშუმის პარკის დამზადებისა და პირველადი დამუშავების ტექნოლოგია, თბ., 1964.

ნ. აბესაძე

ი. დოლიძე
